

佛說佛印三昧經

後漢安息國三藏法師安世高譯

佛在羅閱祇耆闍崛山中時摩訶比丘僧萬
二千人皆阿羅漢時諸菩薩有四百億萬人
皆賢者如彌勒輩也及八方上下諸菩薩稍
增無央數不可復計皆飛到佛所前以頭面
著佛足起繞佛七匝却坐上下相次百千億
萬重不可復勝數文殊師利菩薩最高才第
一光明智慧與諸菩薩絕異無能及者時佛
坐三昧佛身神外衣中衣佛坐光照悉不見
即八方上下無數佛國悉皆明諸有佛國皆
自然供養諸佛菩薩及辟支佛羅漢諸比丘
僧八方上下無數諸佛各遣諸菩薩飛到佛
所坐處邊坐諸菩薩皆會其數如恒水邊流
沙一沙者爲一菩薩如是三十恒邊沙皆悉

上下相次一菩薩者自然坐一大蓮華上佛
都却化天地界數千萬里諸菩薩皆坐滿其
中已彌勒菩薩等及舍利弗即前叉手問文
殊師利菩薩言仁者最高才佛向者三昧今
皆不見不知所至疑當有意願欲聞之文殊
師利謂彌勒言仁者高才旦暮當作佛舍利
弗者卿是佛弟子得羅漢道最智慧才猛何
不各自一心坐禪推索佛身神知如何行乎
即諸菩薩及阿羅漢等無央數皆坐一心推
索八方上下無數諸佛國無窮無極無有能
知佛身神處者彌勒菩薩等舍利弗等復前
長跪叉手問文殊師利菩薩我等一心推索
佛身神無能知處者願欲知其說文殊師利
言皆悉安坐須臾頃自當來還佛還處坐坐
中皆見佛來還時皆歡喜起爲佛作禮禮彌

勤菩薩等舍利弗等前長跪叉手問佛向者
三昧時佛身神外衣中衣皆悉不見亦不知
行何如我等共一心禪索佛身神八方上下
無窮無極了不知佛處願從佛聞佛言所至
到處者大深非汝曹所知也獨諸佛自知之
耳佛言三昧者甚難十九也與相值聞知者甚
快不可言也所以者何甚難聞也佛言諸菩
薩求道奉行六波羅蜜不毀失千億萬劫尚
不能得值佛三昧時亦不能得聞知佛三昧
名也復行六波羅蜜精進不懈三千億萬劫
聞佛三昧名與相值尚復不信向之有也復
行六波羅蜜不毀失七千億萬劫聞佛三昧
者尚復不信向之有也復行六波羅蜜不毀
失八千億萬劫聞佛三昧名者乃信向值之
耳信向有者一時之聞若與相值者心中歡

喜踊躍一日一夜勝復行六波羅蜜却後三
千億萬劫也所以者何聞知三昧者其後求
道得佛疾佛三昧名者是摩訶般若波羅蜜
經智慧印也菩薩求道得聞摩訶般若波羅
蜜經智慧印者大善不可得聞也菩薩求道
欲得作佛要當得摩訶般若波羅蜜經摩訶
般若波羅蜜者是八方上下諸佛大父母也
得摩訶般若波羅蜜經乃得作佛耳菩薩求
道要當積功累德滿乃聞摩訶般若波羅蜜
經耳菩薩求道不得摩訶般若波羅蜜經者
不得作佛也佛言其有善男子善女人信向
有佛三昧經名對其跪拜慈心歡喜者其人
即得其福後世亦復得其福壽終盡生天上
作天王壽盡下生世間復作遮迦越王如是
壽終生天上天上壽終下生王侯家展轉天

道人道中終不復更泥犁禽獸辟荔鬼神龍
 却後無數劫皆當作佛其有聞三昧名小有
 狐疑不信大如毛髮者其人壽終已入十八
 泥犁中燒煮終無有出時然後得出求道者
 未央作佛也所以者何佛三昧經是八方上
 下諸佛要訣印明也佛言我所語如是汝曹
 皆當信之無得疑也誰當證明之者獨有三
 十恒水邊流沙諸菩薩是我小弟皆證明之
 耳佛說經已文殊師利菩薩彌勒菩薩等舍
 利弗阿羅漢等及諸天人民聞經皆大歡喜
 起為佛作禮

佛說佛印三昧經

音釋

繖蘇肝切織絲膊補各切經徒結切堯暮堯
 侯切善紆憶俱系胡計切慄力質切薛荔
 具云薛荔多此云鐵鬼薛毗意切荔力霽切